



20. februar 2023

UPA 2023/167

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imattoq matumuuna saqqummiuppara:

Nunatsinni demokratiimik tamallu oqartussaaqataanerannik qanoq paasinnittariaaseqarnerput pillugu apeqquteqaat aallaavigalugu oqallisissiassatut siunnersuut.

(Inatsisartuni ilaasortaq Aqqalu C. Jerimiassen, Atassut)

Siornatigut demokratiimik Inatsisartuni oqallinneq nangillugu (45/ UPA2020)¹ demokratii aamma tamat oqartussaaqataanerat pillugu oqallisissiassatut qaqsivunga ilaatigut assigiinngitsorujussuarnik nassuiarniarneqartarmata, aamma Inatsisartuni.

Siullermik oqaatsit taakku marluk assigiinngissusaat naatsunnguamik allat ilanngussuuppallaanngikkaluarlugit nassuaqqaalaassavakka minnerpaamik taakku paatsuussutaannginniassammata. Tamat oqartussaaqataanerat tassaavoq inuit isummersorsinnaatitaanerat, aqutseqataanerat. Demokratii tassaavoq politikkikkut tamat oqartussaaqataanerat tunngavigalugu aqtsineq.

Inunnut tamanut eqqaamallaqunartoq tassaavoq, qinersiarunik qinersisanngikkaluarunilluunniit akissarsiaasa affangajaat akileraarutigalugit nunatta karsianut pisartut politikkerip qinikkap akisussaaffigilertaramigit sumut atorneqassanersut. Taamaammat qinersisanngitsup aningaasaatini sumut atorneqassanersut oqartussaaqataaffiginngitsoortarpai.

Demokratiskiusumik aqtsinermik tunngaveqarusulluta tamatta isumaqatigiissutiginikuugatsigu sapinngisamik annerpaamik inuit tusaaneqarnissaat, annerpaamik akuutinnejarnissaat anguniagassaraarput. Demokratimiiminik pitsaasuunnaanngilaq iluamik atunngikkaanni. Oqaluttuarisaanermimi nunani assigiinngitsuni qinikkat aqtsinermimni amiilaarnavissumik iliuuseqartarsimapput inupparujussuit toqorarneqarnerannik kinguneqartartumik.

Oqallorissut oqarluartaartuarumaarput, inuillu ilaat oqassaqqaarput qinersisoqartarmat tassa demokratiskiusumik ingerlasugut. Ilaana, qanormiuna pitsaasumik tamat oqartussaaqataanerat atorniarippit? Ajoraluartumimmi inuit qulangiinnarneqartutut misigippit, inuiaqatigiinnilu kamassaq annertoqaluni. Allaallumi inuit isumaqaleqqapput Danmarkip aqukkaatigut, naak uagut tamatta ulluinnarni atukkatsinnut tunngasut nammineerluta oqartussaaffigigigut, qinikkattalu tamakku ilusilersugarigat.

Isumaqpungu ajornanngippallaarujuusuartoq allat pisuutiinnassallugit. Allanik pisuuitseqattaartuarneq, politikkerinut, nunanut allanut, inuiannut allanut, iliuusissaaleqinermut

¹ https://ina.gl/media/2545285/pkt45_fm2020_foresp36_borgerinddragelsen_inuit_ataqatigiit_da.pdf



takussutissaapput kiisalu demokratiskiusumik aqutsiniarneq iluatsippallaanngitsuusooq assersutissaalluarput. Isiginnaartuinnartut misigilersimaneq kamassaqarnerlu. Aali innuttaasut namminneq qinigaat.

Oqarluartaartut tusarnaarpallaarpagut? Siunertaq kusanartoq, anguniagaq taamaallaat tunngavigivallaarsimanerpagut? Nalullugulu QANOQ taakku angussanerlugit.

Assersuutigiinnarlugumi mittarfiit. Kiammi mittarfittaarnissaq akerlilersussammagu. Taamaattorli QANOQ iliorutta, aningaasalorsornissaa qanoq iluatsissanersoq il.il. Aqqutaanilu taakkuninnga apeqqusiisoqarpat ineriaartornermut akerliusutut taaneqassallutik. Massakkummi takusinnaalereerparput aningaasaqarnikkut, sulisoqarnikkut allallu pissutsit pillugit soorlu eqqarsaatigingitsoorneqarpasissimasut.

Atassummit siunnersutigissavarput, siunertaraarpullu inuit tamatta inatsisitigut aningaasaqarnikkullu kiffaanngissuseqarnerulernissarput. Inatsisit pinngitsaaliissutaasut soorlu assersuutigalugu utoqqalinersiassanuit ileqqarisussaatitaaneq, "siunertaq kusanartoq" innuttaasunik artukkiisoq kiffaanngissusiiaranermik inerneqartoq. Aningaasatigullu kiffaanngissuseq qaffassarujussuarsinnaavarput akileraartarnerup apparujussuarneratigut. Taamaalilluta innuttaasut inuunitsinni oqartussaaqataanerulersutut akisussaaffeqarnertullu misgilissagaluarpugut, pisortat politikkerillu isumalluutigivallaarunnaarlugit.

Atassummiit paaserusupparput tamat oqartussaaqataanerat qanoq isignerissi, qanorlu demokratiskiusumik aqutsineq paasinerissi. Ajoraluartumimmi kingullermik taamaallaat qinersarneq ataatsimoorfigisatuarisimavarput. Tamanna naamannerpa? Qanoq demokratii nukitorsarusupparput? Pisortaniit? Tusarniaasarnikkut? Immaqaluunniit inuit kiffaanngissuseqartinneratigut? Inuit inuunerminni nammineq oqartussaanerat qaffassarlungu? Inuit tatigivagut?

Oqallilluarisi.